

**Timersortartut nuna tamakkerlugu unammisartut peqataanerisa taakku sulliviinnut imaluunniit ilinniarnernannut sapinngisamik ajoqutaasinnaasumik kinguneqaqqunagu qanoq iliorluni timersortartut nuna tamakkerlugu unammisartut atugaat pitsanngorsarneqarsinnaanersut misissoqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Kalaallit Nunaanni Timersortartut Kattuffiat, immikkut kattuffiit kiisalu allat susassaartut soqutigisaqaqatigiit misissuineranut UKA2018 tikitsinnagu Inatsisartunut agguanneqartussamut peqataanineqassapput.**  
(Inatsisartunut ilaasorta, Nivi Olsen, Demokraatit)

### **Akissuteqaat**

(Ilinniartitaaneranut, Kultureqarnermut, Ilisimatusarnermut Ilageeqarnermullu Naalackersuisoq)

### **Aappassaaneerpeqarnera**

Naalackersuisut sinnerlugit Kultureqarnermut, Ilinniartitaaneranut, Ilisimatusarnermut Ilageeqarnermullu Ataatsimiititaliaq qutsavigissavara isumaliutissiissutaat pillugu.

Ataatsimiititaliaq isumaliutissiissummini Naalackersuisunut kaammattuuteqarpoq:

- Aningaasanut inatsimmi konto pingarneq 40.94.13-imi missingersuutitut ilanngussami sulinngiffeqarnermi annaasanut immikkut atugassanngorlugit tapiissutissatut immikkoortitanit pissarsisinnaasut ilaneqarnissaat sulissutigineqassasoq. Qanoq annertugisunik ilaneqarnissaat GIF/ESG oqaloqatigalugit aalajangersarneqassaaq.

Naalackersuisut ataatsimiititaliap isummersuutaani oqaaseqaatit kaammattuutillu tusaatissatut tiguaat. Naalackersuisut kaammattuut taaneqartoq aningaasanut inatsisissatut 2018-imut siunnersuummut ilanngunnissaa sulissutiginiarpaat. Tassunga atatillugu Naalackersuisut ilisimatitsissutigissavaat GIF aamma ESG, missingersuutitut ilanngussap allanngortinnissaa pillugu attaveqatigiinneq aallartinneqareermat, taamaalilluni tapiissutisinnasut amerlisinnaassammata pisariaqartinneqartut naapertorlugit.

Naalackersuisut maluginiarpaat ataatsimiititaliaq isumaqatigiittoq inassuteqarmat, isumaliutissiissummi kaammattuutit tunngavigalugit siunnersuut itigartinneqassasoq.

Taamatut oqaaseqarluta Naalackersuisut siunnersuutip itigartitsissutigineqarnissaa inassutigissavaat.